



寧波府志卷二十九

傳五

南京兵部尚書郡人張時徹纂修
寧波府知府蜀威遠周希哲訂正

列傳四

唐樂仁規定海人唐光化間任兵部尚書贈金紫
光祿大夫弟仁厚刑部尚書贈銀青光祿大夫

宋史浩字直翁鄞人祖父詔善孚閭里民有鬪訟
常從詔求直不復訟官府以八行科徵於朝不應
浩以南省前行當得教官若浩願習民事初補餘姚

縣尉浩爲國子博士時建普安恩平二王府即除
祕書郎兼普安郡王府教授上嘗命普安王書蘭
亭叙五百本以進浩曰此趙鞅訓戒之旨王溢其
數以進上復賜宮女十人侍王浩曰當以庶母禮
事之王如其言高宗益賢普安遂爲皇子封建王
浩之力也完顏亮寇江上將親征建王上奏請將
兵爲前驅浩時在告力疾詣府啓王曰昔唐肅宗
能從明白幸蜀安有靈武事王大驚亟具奏謝罪
遂從高宗視師以歸由是立爲太子普安即位是

爲孝宗浩遷中書舍人十日爲翰林學士逾三月
參知政事明年拜尚書右僕射同中書門下平章
事兼樞密使孝宗銳意恢復中原張浚屢奏取山
東開都督府請上幸建康浩力與浚廷辯謂帝王
之師當出萬全豈可嘗試以圖僥倖且曰太上倦
勤禪位陛下若奉以行太上寧能俱往都城一有
驚動陛下何以處太上孝宗悟其言後竟繇禁中
命邵宏淵等出兵浩語僕射陳康伯曰吾屬兼樞
密兵出不與聞將言用相哉遂丐罷爲御史王十

朋論劾出知紹興浩歸南十四日符離師潰凡一
十三萬人浚上表自劾浩復勸上速議和後知紹
興府復判福州淳熙五年拜右丞相七月即罷浩
再相時朱熹教授生徒於建寧山中浩力挽之出
守南康浩雅度涵蓄凡議毀浩者悉獎引之如陳
之茂與郡莫濟掌內制皆上所異也又嘗薦陸游
賜進士出身在經筵薦薛叔似楊簡陸九淵葉適
袁燮等十五人又薦金安節汪應辰等三十四人
後皆通顯兩授節鉞遍歷三公壽八十九始諡文

惠後更忠定追封越王歷官表奏皆手屬藁耄猶
不倦文集五十卷號真隱漫錄論語口義二十卷
尚書講義二十二卷周官講義十四卷論者謂其
宅心平恕而不能相其君恢復之謀君子少之長
子彌大終禮部侍郎力學勵行著衍極朴語諡獻
文彌正敷文閣待制彌遠字同叔忠定罷相歸東
湖與弟彌堅先後生忠定深器之嘗曰吾口不言
兵後必有爲宰相者二子優劣吾未能審也一日
携客游湖寺二子從忠定陰戒從者進食踰晡時

彌遠疑坐無怒色忠定益竒之登王容榜進士折節下士與東萊呂祖謙游從忠定既卒以大理司直遷諸王宮大小學教授出知池州提舉浙東常平入爲起居郎兼資善堂直講權禮部侍郎韓侂胄師敗江淮蜀吳曦反彌遠與皇子榮國公密議入啓皇后召夏震傳詔殛殺之初餘杭趙汝讜汝談集歷代皇后事號曰坤鑑進后禁中后頗向之會彌遠議誅侂胄后意遂移而汝談兄弟終彌遠世不得入朝嘉定元年知樞密院事後拜右丞相

復故相趙汝愚呂祖泰等官召林大中樓鑰等故老十五人入朝十五年皇子榮國公薨立濟國公竑爲皇子時彌遠久居相位頗不自安竑好鼓琴彌遠買美人善鼓琴者納諸御殿竑動息竑甚嬖之嘗指瓊厓地圖他日欲以竄彌遠又呼彌遠爲新恩以他日非新州則恩州也語寢聞彌遠惡之乃密以越州宗室子與苜爲沂王後更名貴誠援高宗立普安恩平二王故事將復立爲皇子十七年八月會寧宗大漸亟白皇后言貴誠賢德皆先

帝猶子遂宣遺詔立爲皇太子即帝位是爲理宗
卒誅濟王復爲相十年擅權用事專任儉人議者
羣起攻之而彌遠反用李知孝梁成大爲鷹犬一
時君子貶斥殆盡紹定二年薨於賜第贈中書令
追封衛王諡忠獻彌遠子宅之戶部尚書幼子宇
之觀文殿學士宇之謙儉不事紈綺冬月居敗屋
葛屨弊衾士論賢之彌堅別有傳

鄭清之字德源鄞人登嘉定十年進士第母胡氏
將就蓐三日甑鳴甬生嫡母欲不舉丘嫂邊氏請

於舅姑願已乳之既貴奉邊氏如母卒爲服蓐以
報教授峽州江陵帥趙方善風鑑夜夢有告者曰
明日當有貴客至宜敬禮之厥明典客以峽州教
授謁入方從廳屏窺清之狀貌鰲瘠短小不稱所
夢賓次坐逾日旻方往來諦視之危坐迄不惰方
大器服且曰公它日大貴願以二子相累初召爲
國子錄史彌遠密語之曰皇子不堪負荷聞後沂
邸者甚賢君善訓迪之事成彌遠之坐即君坐也
言出於彌遠之口入於君之耳若一語洩者吾與

君皆族矣即除清之魏憲王府教授遂極力翼贊
寧宗崩以嗣子即帝位是爲理宗寶慶元年除起
居郎逾年權給事中進翰林學士未幾拜簽書樞
密不十年爲丞相遂召真德秀魏了翁崔與之趙
汝談徐僑尤焞洪咨夔王遂李宗勉杜範游侶袁
甫李韶凡數十人爲侍從是爲端平元年三年行
明堂禮九月大雷電罷家居凡十年淳祐五年入
朝拜奉國軍節度使兼侍讀已乃拜太傅右丞相
進左丞相封魏國公致仕越六日卒封魏郡王諡
忠定清之以定策功四登相位端平之間召用正
人號小元祐至再相則年齒衰暮政歸妻子而間
廢之人多因緣以賄進爲世所少云

史嵩之字子由魯祖木建炎元年金寇猝至率姑
姊毋妻五族暨其鄰保航海得完者踰二千人木
孫五人皆登進士第嵩之少儻喜經濟嘗與內
弟陳埴講學山寺寺僧厭之嵩之怒夜焚其廬嘉
定十三年登進士第紹定五年歷遷大理卿兼權
刑部侍郎升制置使兼知襄陽府六年遷刑部侍

郎仍舊職端平元年乞祠進寶章閣直學士提舉
太平宮歸養田里尋以華文閣直學士知隆興府
兼江西安撫使乞祠進寶章閣學士兼制置等使
嘉熙元年進華文閣學士兼安撫制置等使二年
拜端明殿學士職任仍舊恩數視執政詔入覲拜
叅知政事督視諸道兵已又拜丞相加樞密都督
四年入相眷顧特隆賜賚無虛日淳祐二年進金
紫光祿大夫加食邑封永國公會父彌忠卒將起
復三學交論之未幾臺諫合疏服闋勒致仕居家

十三年而卒贈少師安德軍節度使諡莊肅德祐
初以右正言徐直方論奪謚初嵩之從子璟卿嘗

以書諫曰

伯父乘天下之大政必辦天下之大事
膺天下之大任必能成天下之大功比

所行寔不克終用人之法不待舉劾而以官者有
之譴責未幾而旋蒙叙理者有之不難未幾而遽
被起復者有之借曰有非常之才有不次之除醜
恩異賞所以收拾人才而不知斯人者果能運籌
帷幄獻六奇之策而得之乎抑亦獻賂幕賓而得
之乎果能馳身鞍馬效一戰之勇而得之乎抑亦
效顰奴僕而得之乎徒聞苞苴公行政出多門便
嬖私昵狼狽萬狀祖宗格法壞於今日自開督府
東南民力困於供需州縣倉卒匱於應辦輦金帛
輓芻粟絡繹道路曰一則督府二則督府不知所
幹者何事所成者何功近聞蜀川不守議者所歸
退師於鄂之失何者分戍列屯備邊禦戎首尾相

援如常山之蛇維揚則有趙蔡廬江則有杜伯虎
金陵則有別之傑為督府者宜據鄂渚形勢之地
西可以援蜀東可以援淮北可以鎮荆湖不此之
圖盡捐藩離深入堂奧伯父謀身自固之計則安
其如天下蒼生何是以饑民叛將乘虛擣危侵軼
於沅湘搖蕩於鼎澧若江陵之勢苟孤則武昌之
勢未易守荆湖之路稍警則江浙之諸郡焉得高
枕而臥况殺降失信則前日撤疆之計不可復用
矣內地失護則前日清野之策不可復施矣此隙
一開東南生靈特几上之肉耳則宋室南渡之疆
土惡能保金甌之無闕也蓋早為圖上以寬九重
宵旰之憂下以慰雙親朝夕之望不然師老財殫
績用不成主憂臣辱公論不容萬一不畏強禦之
士繩以春秋之法聲其討罪不効之咎當此之時
雖欲優游菽水之養其可得乎異日國史載之不
得齒於趙普開國勲臣之列而乃廁於蔡京誤國
亂臣之後遺臭萬年果何面目見我祖於地下乎
人謂禍起蕭牆危如朝露此愚所痛心疾首為伯
父苦口極言為今之計莫若盡去其入幕之群小
悉召在野之君子相與改弦易轍戮力王事庶幾
失之東隅收之桑榆矣如其視失而不知救視非
而不知革薰蕕同器駑驥同櫪天下大勢駸駸日
趨於危亡之域矣伯父與璟卿親猶父子也伯父
無以少年而忽之則吾族幸甚天下生靈幸甚我
祖宗社稷幸甚居無何璟卿暴卒相傳嵩之致毒云

宣繒勤人嘉泰三年太學兩優釋褐授太學博士

歷仕至嘉定十四年同知樞密院事兼參知政事
明年拜參知政事以資政殿學士奉祠端平三年
召赴闕陞太學士提舉洞霄宮以觀文殿大學士
致仕卒贈少師詔繒嘗預定策以王堯臣故事贈

太師諡忠靖

余天錫字純父昌國人登嘉定十六年進士第祖父滌教授史浩子孫因居于鄞天錫亦爲彌遠府童子師性謹愿絕不與外事彌遠器重之時彌遠在相位久皇子竑深嫉之彌遠不自安念欲有廢置而近屬無可嗣者會沂王宮亦無嗣丞相欲借是陰立爲後備天錫試于鄉秋告歸彌遠密語之曰今沂王無後里中宗子賢厚者幸具以來天錫渡浙抵越西門天大雨過全保長家避雨保長知

其爲丞相館客具雞黍甚肅須臾有二子侍立天錫異而問之全曰此吾外孫趙與莒與芮也日者嘗言二雛後極貴天錫因憶彌遠言還臨安以告遂召見彌遠善相大竒之遂密諭與莒還其父家天錫母朱氏爲沐浴教字禮度益閑未幾召入嗣沂即迄即帝位是爲理宗寶慶元年超除起居郎不數年拜叅知政事復守鄉郡母夫人封周楚國夫人壽過九十將以生日拜天錫爲相天錫以病卒贈太師諡忠惠第天任爲兵部尚書兄弟友恭

方貧時率更衣以出終歲同衾及晚貴盛復約以昭穆同葬

國朝金忠字世忠鄞人慷慨豁達負氣岸善謀畧先戍趙州薄游至燕神於卜事適文皇舉義靖內難忠以布衣召見署紀善同姚廣孝運籌潛邸明年署長史從征又明年上正大寶拜工部右侍郎陞兵部尚書詹事府詹事國家大政多出裁決上初議建儲武臣丘福等咸謂次子高煦有扈從功請立之忠獨言嫡長之義不可廢議定遂

命忠輔導斥邪去佞務引當道上以忠老成正

直命兼輔皇孫尤見優待里居時嘗爲人所侮其人後補吏來京懼弗釋怨忠以其才薦用之忠事

上敬慎每承顧問知無不言退未嘗少泄遇同

列論事不苟阿壽六十三以遽疾卒逾十載仁宗嗣位追贈榮祿大夫少師謚忠襄官其子達爲翰林檢討賜歸依親讀書正統十一年驛召至京改禮科給事景泰初元遷都給事中剛直敢言無所避忌儉少多憚之二年陞長蘆都轉運鹽使

袁珙字廷玉鄞人元翰林檢閱官士元子自幼勵精儒業博覽郡書得相人之術識真主於燕邸舉靖難師言皆驗拜太常寺丞後以省墓還家卒賜葬祭贈太常少卿子忠徹蚤傳珙術授鴻臚序班成祖嘗勉之進學陞尚寶丞復諭使親詩書庚申改中書舍人已丑新營北京忠徹扈從每預大議後奔父喪葬畢復召赴京扈征瓦剌丙辰陞少卿再扈從北征洪熙改元賜還家宣德初復起前少卿後隨駕北征復侍英宗己未上章乞歸

卒父子占事皆奇驗語在特藝傳中珙性剛方自少安貧養志篤於孝友親疾甚則籲天祈減年以益親壽後疾果瘥有以役他徙者委之金百鎰不相聞者十餘年後其人歸以金還之封識如故友人以事逮而歿珙收厝以歸其母立朝小心慎密每建言爲上所眷愛後居家好吟咏所著有柳庄詩集忠徹侍文皇每建議切直無所回互如諫遣使取寶諫武職宜隹終喪諫弗服方士藥諫輔導太子宜選文學老成之臣皆爲讜論有鳳池

吟稿符臺外集拙休稿子應驤治書嘗以父所纂人象大臣進呈因賜錄用授鴻臚序班

陳恭字孟起從其叔陳遠徙家于鄞舉永樂乙酉鄉試與修大典歷政秋官出判興化府事陞工部營繕司郎中政咸稱最宣廟時超拜大理寺右少卿時有男子嗜酒者妻苦諫逆耳而男子尋醉自剄有司以妻威逼論死獄移大理恭廉得其情欲原之而柄刑者必不可恭寢不成寐徬徨達榻行遂表請乞去卒貸其人轉左通政英廟時進

工部右侍郎已又進尚書飭材節費百度維熙景帝時眷注尤渥懇乞骸骨以歸人以知止稱之未幾卒賜諭祭營葬

秦鉞字懋功慈人正德甲戌進士爲湖廣攸縣知縣政績有聞進監察御史巡按江西監臨乙酉鄉試取士多得人陞徐州兵備副使丁憂服闋補江西九江兵備陞山東叅政按察使左右布政使才識通敏敷歷著聲擢副都御史巡撫江西召入內臺不數月乞歸而卒

徐錦字章甫慈谿人舉進士爲甌寧令以撫字著聞爲監察御史按廣西威名大振歷陞都御史巡撫順天先事慎防夷情警服撫養士卒得其死力邊塵不驚方以公輔期之而引疾乞休皆服其勇退云

趙文華字原實慈谿人幼穎異爲舉業時出古格不作世俗語第嘉靖己丑進士爲兵部主事力追古作蔚然成章然性素豪宕不拘小節謫東平州州同已而復起爲南京稽勲主事改刑部主事歷

陞通政司使工部侍郎時東南倭寇繹騷奉命督察有功進太子太保工部尚書會內逆徐海又勾夷爲患再上疏請討率先戎行卒又破賊加少保已而以疾乞骸罷免遂卒

司馬氏曰爵以馭貴祿以馭富帝王所以宰造區宇鼓役群動官人能而熙庶績也賢豪俊髦進都通顯蟬聯鵷造以明得意古今人夫豈少也語云凌風厲翮恣意所存激印萬乘之主一言取卿相之位雖其人之智力哉亦會其時焉已世固有抱

德明道而白首牖下余悲其君專寵獨任不能揚
休流潤余悲其臣是故耕野釣海之夫遽難以齷
齷棄之而乘軒列鼎叱咤風生者未必皆赫赫曜
也吁可念哉

寧波府志卷二十九

寧波府志卷三十

傳六

南京兵部尚書郡人張時徹纂修
寧波府知府蜀威遠周希哲訂正

理學

宋楊適字韓道慈谿人淳厚介特容儀偉然治經
不事章句黜浮屠老氏之說善言治道歷究治亂
之原人有善則稱之不善如未之聞爲學務力行
唯恐爲人所知毀譽榮辱不以動其心人莫得而
親踈鄉人憚之相語不以名氏尊之曰大隱先生

衣食纔自給非義之餽一介不取躬耕養親族之貧者分賑之隣有盜其稼者人告之適愀然曰彼窮厄求拯其生爾勿治也盜聞之慚悔無敢侮者孫沔自諫官出按浙東西刑獄召之不赴遂之越始友錢唐林逋後與同郡王致杜醇爲友退處四十年行高望重宋仁宗詔求遺逸太守鮑軻以名聞賜行粟帛太守錢公輔又薦之授將仕郎試太學助教州遣從事致書袍笏輿從迎之辭不受遯大隱山壽七十六

王致字君一鄞人與楊適杜醇爲友俱以道義化鄉里諸生子弟師尊之皆稱爲先生嘗與牧守言政事王安石復書曰無事於職而愛民若此可以爲仁矣年踰七十樂道安貧妻收遺棄子拾墮薪浩然無悶鄉人莫不高其行仁宗朝詔天下立學有文材道義者與本州校官致辭不受後召爲秘書省校書亦不赴宰臣陳執中奏錄致文得一百八十篇藏之秘閣卒葬邑之棲鳳山人尊稱曰鄞江先生荆公誌墓曰四明士大夫立言以垂後世

者自先生始云

杜醇越之隱君子居慈谿學以爲己隱約不求知
孝友稱于鄉里耕桑釣牧以養其親經明行修學
者以爲模楷慶曆中鄞始建學縣令王安石請爲
之師不赴再書強起之醇始就焉慈溪令林肇立
學又起醇爲師亦固辭安石又作師說以勉之二
邑文風之盛自醇始

王說字應求鄞人王致門人也弟該登慶曆六年
進士第說隱居教授餘三十年建書院於栝源鄉

熙寧九年神宗特恩補將仕郎爲州長史御書栝
源書院四大字賜之說無田以食無桑麻以衣怡
然自得子孫世其家子珩宗正少卿孫勲廣南市
舶一錢之利皆歸有司不識舶貨之名及卒賈胡
率錢二百萬爲賻子正已却之曰吾父以廉直聞
雖貧猶能負喪以歸不愧廉叔度也清白之傳實
先生家訓正已終大府鄉

樓郁字子文自奉化徙鄞卜居城南志操高厲學
以窮理爲先爲鄉人所尊屢空自樂慶曆中詔郡

縣立學延致鄉里有文學行義者爲之師郁掌教
縣庠者數年又教授郡學前後三十餘年學行篤
美信於士友一時英俊皆在門墻最知名者豐稷
袁轂羅適郁登進士第調廬江主簿自以祿不及
親絕仕進意以大理評事終于家有遺集三十卷
贈正議大夫子孫皆踵世科五世孫鑰德行文章
爲時名臣仕至叅知政事

以上稱慶曆五先生

袁燮字和叔鄞人生而端粹專靜乳媪置槃水其
前玩視終日夜臥常惺然稍長讀東都黨錮傳輒

以名節自期入太學見陸九齡遂師事之同里沈
煥楊簡舒璘皆聚于學朝夕以道義切磨第進士
爲太學正時名儒朱熹輩皆斥燮知不爲時所容
尋以學黨去更歷外服入朝至太常丞兼考功郎
知江州提舉江西常平以都官郎召遷司封又遷
國子司業祭酒延見諸生迪以切已之學聞者興
起以秘書監兼崇政殿說書遷禮部侍郎侍講兼
祭酒每講必託義以諷立朝守正不阿議者指爲
好名遂奉祠以歸著述弗倦或勸宜少休曰吾以

此爲笙鏞管磬不知其勞也終顯謨閣學士贈龍
圖閣學士諡曰正獻嘗曰此心存則雖賤而可貴
不存則雖貴而可賤吾心與天地一本精思以得
之兢業以守之則與天地相似每謂爲學當以聖
賢自期仕宦當以將相自任其所講明體用兼綜
於書禮論說尤詳成就後學甚衆子甫進士第一
爲兵部尚書國子祭酒亦稱名儒

沈煥字叔晦自定海徙鄞偉儀觀尊瞻視音吐鴻
暢羣居鄉校以嚴見憚入太學行藝優諸生始與

臨川陸九齡爲友一日盡舍所學師事焉晝夜鞭
策務本趨實不自矜衒第進士講學不倦自以資
稟剛勁非所以歡庭闈大書深愛和氣愉色婉容
數語于壁日觀省焉門人弟子決疑請益者自遠
而至啓告簡嚴中心悅服師道益尊爲太學錄修
教養法士爭歸之不詭隨苟容以取光寵遂補外
終于舒州通判煥非聖哲書未嘗誦習與朱文公
呂成公問辯凡世變推移治道體統明君賢臣經
綸事業孳孳講求日益深廣追贈直文華閣特諡

端憲

楊簡字敬仲慈谿人清明純一非禮不動燕私儼
恪如臨君師學以古聖爲的入太學第進士主富
陽簿日坐公堂輒諷詠魯論孝經不動聲色而民
自化陸九淵道其邑齒長二歲指以心學之要遂
北面師事焉調紹興府理椽朱熹持庾節首薦之
每稱簡學有爲已功夫宰饒之樂平謂教養茲邑
欲使邑人皆爲君子况學者乎誨之醇醇不倦爲
講堂訓曰學者孝而已矣時有古今道無古今性

無古今聞者興起以國子博士召講易乾卦發人
心固有之妙趙汝愚免相祭酒李祥抗疏辯之簡
上書亦以學黨斥間居十三年以秘書召遷著作
將作少監守温州訪賢者禮致之崇孝養明宗族
相卹之令首行鄉舉倣周官敬敏任卹之類書善
不書惡除工部郎將作監告老奉祠召不起終敷
文閣直學士以寶謨閣學士致仕壽八十六諡曰
文元有詩易春秋論語古文孝經傳孔子閒居解
又著已易輯先聖大訓簡至誠篤敬基功之戚下

洎總麻一以經禮爲則而容色稱之平居接物從容和樂未始苟異於人而高遠自不可及北方傳誦其文曰此江南楊夫子也

舒璘字元質奉化人雅有大志恥以一善自名篤實不欺無毫髮矯僞入太學師張栻又從陸九淵朱熹及呂祖謙兄弟講習力於躬行嘗曰非能一蹴入其域刻苦磨厲改過遷善日有新得亦可以弗畔云爾第進士教授徽州以身率多士日詣學寒暑不懈暮夜亦間往勸誘啓迪質或不美未嘗

忿疾需其自新作詩禮講解以授諸生徽人追思之曰吾鄉學問之源窒而復通者先生實開之因祠於學璘信道甚篤利祿之念不萌宰平陽臨政聽斷人服其平終于宜州通判淳祐中特諡文靖

以上淳熙四君子

胡謙字牧之奉化人與弟誼師事袁燮傳陸象山學著易說易林若干卷誼字正之嘗內交蒙齋號觀省佚翁著尚書釋疑十卷觀省樵著三十卷兄弟文學爲鄉表儀

舒津字通叟奉化人讀書績學期至古人登景定三年進士第遷大學博士知平江蒞事勤敏雅志澹如嘗博采傳記著續蒙求尚書解春秋集註十七史綱目從弟許字平叟清苦獨立景定元年入太學講明正學雖寒暑弗懈著易釋二十卷繫辭釋三卷讀史隨筆五卷心書六卷一門經學人謂得於文靖之傳

趙與憲字德淵宋祖十世孫初寓青田嘉熙中知平江府郡中饑分場設粥以寓公方萬理董其事

全活數萬人行飲射禮于學宮廣絃誦以嚴教養學官子弟爲立生祠慕楊文元公簡倡道學於慈溪不遠千里因從弟與明詣門授業得其心學歷官司農少卿兼知慶元府沿海制置副使度地縣之湖北創立慈湖書院以崇祀之遂自青田就居慈溪累官至提舉洞霄宮贈少師謚忠憲

竺大年字耕道奉化人性行嚴重理學淹貫家法整肅鄉人歸敬受業沈端憲公煥所著有禮記訂義等書楊琪銘其墓

程端禮字敬叔鄞人別號畏齋學宗朱熹務適于用初爲建平建德兩縣儒學教諭歷信之稼軒建康之江東兩書院山長元文宗在潛邸遣近侍子弟來學賜以金幣牢醴禮遇甚至累考授鉛山州學教授鵞湖書院旁有道院一日見驢跑地驅去復來默卜而發之得十餘石碣刻羣賢像因立堂祀之秩滿以將仕佐郎台州路儒學教授致仕明守王元恭禮請爲學者師嘗謂門弟子曰學問之道具在聖經賢傳真知實踐則存乎人壽七十有五忽病劇醫者進藥却之坐頃頭容稍偏門人告之復端坐而逝所著有進學規程國監頒之郡縣學有畏齋文集藏于家

程端學字時叔鄞人至治甲子會試第二授僊居縣丞未行尋改國子助教陞翰林國史院編修官每論撰爲學士虞伯生所推服中書選考鄉試號稱得人南宋間四明學者多宗陸氏惟黃東發史蒙卿獨宗朱氏端學與其兄端禮師蒙卿盡得朱子明體適用之指二難自爲師友端禮色莊氣和

善誘學者使之日改月化而端學方毅剛正一舉動必合禮法人以比河南程氏兩夫子云在國學時嘅春秋在六籍中獨未有一定之論乃取前代百三十家折衷異同著春秋本義三十卷三傳辯疑二十卷或問十卷用經筵官請命有司取其書板行天下以授來學

劉希賢字仲愚鄞人少嗜學長從鄉先生薛觀學春秋博習強記爲文敏疾至順間中浙江鄉試復中春闈授太平路天門書院山長講論經傳得其

旨歸調長信州白石書院郡牧邑長咸就講焉後改會稽教諭見雅樂敝弛嘆曰聖人制樂所以格神人和上下定民志詎可闕哉乃捐俸率諸生命工修飭秩滿陞江浙儒學副提舉致仕所著有春秋比事鉅窩類藁號木石子人稱爲木石先生謝源父定海人閉門讀易能古文詞而尤邃於理學晚年好游山水興至則吟詩以自遣子應辰字濟明受父易得其指要用薦爲太子說書改無爲州學錄至正初解冠歸隱而終

鄭奕夫字景允鄞人宋丞相清之曾孫也幼穎悟
絕人動止中矩度潛心性理講學績文克守清白
嘗爲慈谿麗水常山三縣教諭調徽州紫陽書院
山長陞浮梁州教授所著有論語本義中庸大學
章旨衍桂堂集若干卷稱爲習齋先生

國朝桂彥良名德稱以字行慈谿人記誦敏捷及
聞楊簡學益以尊德性爲本仕元爲教授因朝政
不綱退隱田里

高皇帝召見特授太子正字 賜宴與公侯列坐

日侍講讀 上詔詞人賦詩賡歌彥良每先衆而
就嘗進奏曰治道具在六經典謨訓誥願留聖意
詩非所急也 上深然之自是恩遇隆洽稱曰老
桂而不名 上嘗御大本堂彥良與秦府紀善林
溫入見 上問之各以官對 上謂彥良曰卿帝
者師謂溫曰卿王者師其各自重彥良感荷知遇
知無不言每侍講必以二帝三王爲本而折衷於
孔孟要以明聖學格君心爲務至於歷代治忽啓
迪不倦誠意懇至凡所陳說無一不當 帝心

上方以法繩下訪曰法數行而數犯奈何對曰用德則佚用法則勞法以靖民則民勞而弗靖德以靖民民亦靖於德矣 上深然之 上從容問曰人有過如何彥良對曰過雖聖賢不能免勿憚改者君子也又問仁者有好惡乎彥良對曰惟仁者能好人能惡人於是命東宮及諸王大書揭之奉天門 上語及三教彥良對曰治天下必法孔子 洪武八年特授通奉大夫晉相府右傳 上親製手詔以孔孟諭之陞辭 上曰江南大儒惟卿一

人彥良謝曰臣不如宋濂劉基 上曰濂文人耳基峻隘不足取既侍王就國日以正大之學輔之王以綺衣鞍馬畫彥良像以賜後諸王府罷相府改彥良爲長史時已老王爲造安車奏令致仕彥良退作存養省察圖以進王揭諸座右以時觀省者曰法天道廣地利順人心養聖德培國脉開經筵精選舉審刑罰敦教化馭戎狄蒐賢俊廣咨訪凡十二事總名曰萬世太平治要策 上嘉納之

以風疾賜歸卒于家所著有清節集清溪集柱笏
集老拙集和陶詩春秋詠傳於世平生見道純一
不以貧富動心仕止進退一委於義命與人交坦
坦施施命觴賦詩踔厲風生窮日夕不厭時以春
風和氣目之

王桓字彥貞慈谿人洪武四年有司以通經學古
薦于朝 太祖高皇帝召見便殿問桓處鄉里好
惡何如桓對曰善者好之不善者惡之一言稱旨
上遂呼爲老學士乃命與尚書魏杞山錢惟明學

士宋景濂講論治道踰年授國子學正未幾轉河
南盧氏縣令政教一新民懷其德十二年致仕盧
人立祠祀之先是桓家居鄉人有不平事無大小
咸取決於桓無不得其情者遂稱爲明白先生其
所學不事章句務得於心識者謂其克繼虞賀杜
樓之絕學所著有明白先生集藏於家桓以孫來
貴贈都察院右都御史兼大理寺卿

傅淳字伯厚鄞人世業儒父時以道學名淳幼有
成人志稍長知自奮嘗業舉子試不利即取所業

藁焚之益究經史百家言正以濂洛諸儒之說以窮性命道德之奧讀易至繫辭曰聖人以此洗心退藏于密拱手立曰淵乎休哉遂顏其室爲退密鄉人以退密先生稱之問學純正不求人知守令聞其賢每訪以治道必參酌古今以對至老不廢書一夕讀周禮漏下三鼓不置侍者請問淳曰吾樂此不知疲也就寢而逝所著有洪範敷言性理叢說大學補畧視志藁藏于家

倪復字汝新號畏菴鄞人性端謹嚴毅少力學無間寒暑且勤劄記讀書不摘章摘句而窮索幽眇務得指歸嘗曰士生程朱後已幸有坦程矣更欲立門戶與抗邪故其說經談理止按先儒成法會而通之如辯大學親民叅之金縢新逆及析周程主靜主敬之說非徒言也爲門人講易及正蒙諸書詞旨洞達聽者莫不悟解尤邃於鐘律辯析名數鑿鑿中理潛思默會超然獨得故見人輒舉與義不啻懸河之注也平生篤於孝友親喪哭泣遂成目疾弟子束修之饋不入私室盡以資於弟檢

身以禮市肆優場不一履其足人嚴憚之或羣居
談謔復至則寂然歛聲師道甚尊而善引進名士
若通政余本邃理學有聲此其一也諸提學使者
咸加賓禮而內江劉公瑞尤爲篤異云所著有易
繫辭解中庸解正蒙發微皇極經世書通解鐘律
通考閒居漫讀記東巢襍著壺齋問答救災集議
禘祫議濬湖議見聞欄楯觀古錄畏菴存藁藏于
家

余本字子華鄞人生而英邁卓厲立志不羣讀書
不爲科舉文字之學終日危坐諷誦夜則焚膏以
繼自五經以至子史百家罔不鉤玄纂精其微詞
隱義人所不能測究者輒疑神窮繹必於悟解諸
先儒傳註錯出弗協于一反覆參互不會於意不
置已乃疏而辯正之凡天文地理鍾律象數悉研
其奧於張載正蒙尤深妙契蚤思夜索若有神授
之者一日行竹林中見一偉儒儼然衣冠以爲橫
渠先生也嘗言人對聖賢書則心明氣定即他玩
好不能入從此攝伏身心自然有益故其讀書一

字不苟一成誦即終身不忘及門之士履滿其戶
誦解辯析悉竟指歸期於人人各充所欲時以余
夫子稱之所著有讀易備忘綱目備忘正蒙集解
皇極釋義律呂新書解禮記拾遺周禮考誤家禮
考異春秋傳疑孝經刊誤南湖文錄本初不爲有
司所物色年三十提學楊且試以隱僻事輒大加
詫異謂必魁天下是年果領鄉薦正德辛未第甲
科第二授翰林編修時權姦迭興文事廢不用本
鬱鬱不得志力求補外授廣東提學副使至則以

釐俗作士爲已任振策風厲士皆雲起時潮州妖
巫托廟神以惑衆遂按除之壁立堅凝傾動僚案
有不合即義形於色因是與巡按御史毛鳳忤疏
其不法於朝而御史亦構本御史落職本亦謝事
家居數年絕意進取益受徒講說訓迪不倦嘉靖
丁亥復起山東督學陶範士類一如教廣東者陞
南京通政未幾卒本自幼篤孝能先意承志時或
聞戶外履聲意其父也佇立趨迎娶未數月值母
喪不入私室平居觥觥自持所交與不苟屑於阿

軟庸下之流人多嚴之勇於臨義於得喪是非禍福一不置懷故能無所瞻顧若鷹攫瀾趨莫或牽掣家居食貧稱貸無虛月親族有急傾囊濟之或爲假貸而躬自償焉從兄弟早孤爲之撫養長復室之且給之田其他行誼不可殫述語在張尚書所爲志中

戴圭字秉誠鄞人潛心易學踐履篤實居常語人曰學要謹獨誠意以修身不怨天不尤人久之則與天一嘗揭諸屋楹曰人中合下渾無我地上元

來都是天張尚書邦奇見而亟稱之其徒汪中丞王嘗言曰吾執業戴先生門時先生年甫三十餘貌甚莊氣甚和言甚簡重動止甚矩度讀書能精思其所造可謂深且微矣時所業不過時義而能不屑屑焉每迪玉古人之道至於今思其言不忘云圭性謹厚言動雍默衣冠儼然至時時與親友高會談道理論當世事竟日不休未嘗出一時俗語至易箴之日語子乾曰大學語孟首章皆是天命之性聖賢之言一轍也又曰我平日所著書却

是有用後來必有知者所著有易經大旨四書要
畧及要說等書藏于家人稱爲野橋先生

司馬氏曰性命之學旨于宋儒朱陸之辯論之詳
矣吾明故多文學慶曆五先生爲濂洛的傳淳熙
四君子則象山正脉餘皆羽翼二家各相師友若
後之君子振而起之俗學可廢矣

寧波府志卷三十終

